



天津交通銀行同
人俱樂部圖書室

左文襄公奏稿 卷四十七 起光緒元年乙亥 六月詔十二月

目錄

請 敕催山東省迅解塔城協餉片

督辦新疆軍務敬陳籌畫情形摺

俄國游歷官過境據實陳明摺

請 簡派大員幫辦陝甘軍務摺

甘捐各局暫行停辦片

甘肅鄉試通融辦理摺

恩科補行壬戌科請仍照舊編號取中片

軍餉支絀請速籌解濟摺

奏稿卷四十七目錄

關外新疆軍餉請仍歸戶部核撥摺

請 敕各省勻濟餉需片

請 敕山西劃撥科城臺費片

請 敕兩江迅解老湘全軍月餉片

請 敕福建迅解協甘欠餉片

請 敕劉典迅速赴甘摺

楊昌濬如能去浙度隴可資臂助片

河州鎮沈玉遂辦理番案妥洽請 敕議敘摺

餉源涸竭擬續借大批洋款權濟急需摺

籌借洋款懇照臺防辦法片



軍機大臣字寄光緒元年六月初九日奉

上諭景廉等奏會商軍務見在需糧萬緊并陳糧運情形各摺片烏魯木齊逆匪日久負隅賊黨分踞古牧地等處南路吐魯番則有安集延盤踞大兵進剿勢必互相救援或由南路絕徑窺我後路以圖牽掣應如何分路進兵使該逆首尾不能相顧著左宗棠金順會商機宜妥籌調度刻下古濟等處糧石業已搜買殆盡沙山等處將定西營馬隊撤回就食該處見駐各營口糧仍缺亦應設法接濟金順所部後隊未能調齊前進見經景廉等多方籌畫恐尙難接至新糧延至冬令長途積雪加以天山之阻則挽運更難爲計著左宗棠督飭承辦各員將關內糧石迅速轉運務於本

奏稿卷四十七

年秋間運解數萬石到古城以裕軍食該處需糧情形甚爲迫切倘饋餉稍有不繼貽誤戎機或竟因飢譁潰左宗棠豈能當此重咎耶烏科兩城糧運無從籌辦巴里坤迤北大巴地方收糧亦屬無多歸化包頭採買米麩事屬可行惟運費較鉅左宗棠已派員攜銀二萬兩前往試辦并著籌款增採總之關外軍糧無論由何處採辦左宗棠責無旁貸務當悉心經理俾資飽騰毋得意存膜視署巴里坤領隊大臣慶壽見在降調沙克都林札布能否赴任著金順查明具奏將此由六百里各諭令知之欽此

請 敕催山東等省迅解塔城協餉片

光緒元年六月十三日

再臣於光緒元年五月初十日准塔爾巴哈臺參贊大臣英廉咨稱見准部咨議奏新疆各城軍餉統歸西征糧臺奏請指撥業經

奉

旨在案查塔城自經賊擾戶口流亡城廂村落悉成瓦礫同治十一年春間將寄居伊犁之索倫官兵調赴塔城駐紮始有人煙繼復招集所屬土爾扈特及額魯特蒙古官兵安設東南兩路臺站奏調大同宣化官兵赴塔駐防置備駝馬氈房一切用項甚鉅前奏請籌發每年專餉准部指撥山東山西河南陝西四省自同治十三年起按年各撥地丁銀三萬兩共十二萬兩又奏請加撥銀

奏稿卷四十七

二

三萬兩統共歲需餉銀十五萬兩各省均未報解見在待用甚急咨請先行籌撥前來臣維英廉所咨塔城需餉緊迫自係實在情形無如西征糧臺餉項支絀異常無可騰挪所有指撥山東山西河南陝西等省協解塔城歲需專餉銀兩相應請

旨敕下該各省撫臣轉飭藩司迅籌接濟照常運解軍前以濟要需謹附片具陳伏乞

聖鑒訓示施行謹 奏

軍機大臣奉

旨另有旨欽此同日承准知會本日貴督奏請催山東等省應解塔城專餉片奉有寄信

諭旨令各省照撥迅解矣

奏稿卷四十七

三

督辦新疆軍務敬陳籌畫情形摺

光緒元年六月二十八日

奏爲遵

旨督辦新疆軍務敬陳籌畫情形恭摺仰祈

聖鑒事竊臣於四月初八日承准軍機大臣字寄光緒元年三月

二十八日奉

上諭本日已有旨令左宗棠以欽差大臣督辦新疆軍務金順調補烏魯木齊都統仍幫辦軍務景廉調補正白旗漢軍都統回京供職景廉著俟金順行抵古城後將各營兵勇糧餉移交金順接管再行起程回京新疆軍務孔殷必須速籌進兵節節埽盪金順本有自帶各營益以景廉所部兵力已不單薄著卽督率各營親

奏稿卷四十七

四

臨前敵相機進剿爲收復烏魯木齊之計所有進兵機宜隨時會商左宗棠酌辦袁保恆已令回京供職西征糧臺已諭左宗棠責成陝西藩司經理應行奏催及咨行各省事件呈由陝西巡撫覈辦關外轉運事宜卽在哈密巴里坤各處設立糧餉分局由左宗棠派員經營袁保恆將經手事件逐一交代清楚後起程回京見在關外兵事餉事并轉運事宜均歸左宗棠督辦蘭州相距寫遠鞭長莫及該大臣當統籌全局酌覈辦理關外軍食務當源源運濟以期士飽馬騰毋令停軍待哺宋慶一軍該大臣已咨令回紮潼關本日亦諭知錢鼎銘商令該提督擇要駐紮矣等因欽此跪聆之下悚惕實深竊維新疆之事從前因兵力餉事未能兼顧遂

致叛回構變強敵窺邊土宇人民不可覆按於此而欲力圖恢復
挈二萬里戎索之舊還之職方戢萬千族殊俗之民漸以聲教正

值寰區甫靖財力久殫內患雖平民勞未艾其難誠有倍於拓疆

之始者微臣庸朽菲才又值衰疾侵尋志慮鈍竭何敢不自忖量

謬以自承顧念臣子之義厥重匪躬疆場攸司責無他諉自從戎

伊始卽矢盡瘁馳驅豈頭白臨邊忽易初志謹將所籌情形爲我

皇上敬陳之一曰廣籌軍糧也師行北路宜用北路之糧不但節

費亦免耗糧臣前疏已詳之南路肅局既有見糧又車馱駝隻購

雇稍多可以灌運自宜嚴切督催以廣儲峙北局設於歸化分局

設於包頭飭升用知府前署綏德直隸州知州陳瑞芝提督銜總

奏稿卷四十七

五

兵蕭兆元司之雇民駝轉運計自三月杪至五月據報陸續運過

四千餘萬斤至巴里坤每百斤牽合銀八兩內外袁保恆前奏甯

夏採運臣飭署甯夏鎮總兵記名提督譚拔萃甯夏府知府李宗

賓接辦見據報已雇駝數百先由察罕廟試行如果此路通利再

爲加辦察看漠北素產健駝又便水草惜久未開運倉卒應募者

少又駝戶每以拉差爲苦疑沮不前臣見飭巴里坤鎮鎮道嚴

行示禁冀聞風踵至運道暢行庶餉饋可通亦收節省之益正辦

理間適俄國游歷官索思諾福斯齊等到蘭與之談論近事索思

諾福斯齊自稱俄國在山諾爾地方產糧甚多駝隻亦健距中國

古城地方不遠如中國需用糧食伊可代辦送至古城交收由俄

起運須護運兵弁均由在山諾爾派撥其兵費一併攤入糧腳價內每百斤須銀七兩五錢如年豐糧多駝腳不貴則價尙可減也此卽與定議書立合約計年內可運古城糧二百萬斤明年春夏可運足三百萬斤索思諾福斯齊已專兵八瓦勞伏前往告知其地巡撫據稱斷不致誤臣見委知府銜甘肅候補同知丁鶚等赴巴里坤又委布政使銜甘肅卽補道陶兆熊等赴古城辦理採糧開墾及收支事宜此北路籌糧情形也南路肅局存見糧三萬餘石安西局存見糧一百數十萬斤哈密局除張曜各營外存見糧一百三十萬斤見正趕緊灌運張曜在哈密辦屯墾水利事必躬親不惜勞瘁據報墾荒地一萬九千餘畝可獲糧數千石見據甘

奏稿卷四十七

六

涼肅各廳州縣稟報今歲夏雨優渥冀獲豐稔將來新糧市價有減無增車駝之受雇者亦日多一日轉運較從前稍易此南路籌糧情形也臣因歸化包頭採運巴里坤較涼甘肅採運巴里坤價腳大減而糧則實裝實卸別無虛耗故決計於北路開一運道陸續撥兌實銀已四十餘萬兩甯夏已發銀三萬兩計秋高駝集運數可增南路由甘運肅由肅運安西均用車馱由安西運哈密運巴里坤均用駝隻節設廠局濬水泉刈草薪以利運道一切經費統於見辦採運項下開支計轆轤轉般運數可倍此合南北兩運籌巴里坤之糧也俄國在山諾爾地方緊接我布倫托海邊界距古城數百里俄人代爲採運二百萬斤送古城視巴里坤運古城

路程較近實屬獲之意外計需銀十五萬兩此於北路之北籌古城之糧也就目前局勢籌應前敵急需事之所得爲者止此歷代之論邊防莫不以開屯爲首務或辦之用兵之時以省轉饋或辦之事定之後以規久遠要之得人則有益軍儲不得其人則虛糜經費且西北治地開荒尤資水利就窪潴水障之令深引渠漑田灑之令普旣需人工尤資器具而哈密土質善滲土工石工外別有毛氈包裹之工爲他處所罕見旣需多籌器具又需廣備氈條開墾之先所費卽鉅臣於張曜由安西進屯哈密時已津貼過運腳等銀五萬餘兩購辦氈條價腳銀約九萬一千餘兩張曜躬率所部彈力經營而後得著成效以後踵而行之固此奧區保綏戎

奏稿卷四十七

七

藩可成數十百年無窮之利見復經畫巴里坤收召飢兵一千三百餘名每月給餉銀三千兩配以矛杆槍礮子藥俾其復成勁旅復委甘肅同知丁鶚等勦辦屯墾事務兼收包歸甯夏所解軍糧惟巴里坤地當天山頂畔氣候凝寒舊設天時地利人和等廠久已荒廢屯務雖興恐暫尙難供客軍坐食也由巴城而西北七站地勢沃衍天氣漸和由此而古城迤西一帶更稱膏腴上壤景廉所辦公屯私屯外餘荒甚多若兵民盡力耕墾不虞乏食臣見委布政使銜甘肅補用道陶兆熊揀帶員弁前赴古城驗收俄人代辦軍糧支發價腳一面察看古城一帶情形經畫屯墾事宜隨時馳稟核奪此籌哈密巴里坤古城糧運屯墾情形也一日兵事宜

早爲整理也西事稽延至今未覩成效由於冗食多而戰士少耳旂綠諸營久不足額就近各省無勁兵應調於是取土著兵民及各處就食兵民授地耕墾一備軍食一備戰守無事則驅其盡力隴畝有事則調其效命鋒鏑謂之且耕且戰事非不勞謂之卽兵卽農名非不美然調赴期會則彼此觀望數日不能取齊麾令前驅則勇怯雜糅氣勢不能完整其何以戰且旣挂名伍籍又令其從事耕耘譬猶左手畫圓右手畫方兩者相兼必致一無所就是且戰之兵不能戰且耕之兵不暇耕也茲宜畫兵農爲二擇其精壯有膽之兵宜馬者馬宜步者步束以營制一如內地軍營其習著戰績如徐學功輩用之爲管帶爲督帶其才能辦事如孔才輩

奏稿卷四十七

八

用之爲幫辦凡督帶管帶以及所部哨官什長酌給薪水辦公銀兩散人給餉與糧按照客軍營制減給其愿弱不任戰者散之爲農按照戶口指餘荒地畝令其承墾由官酌給籽種農器耕牛收穫後繳本歸倉外不取息其所穫糧石由官照時價收買庶簡其精壯營伍可得而實散其愿弱屯墾可得而增兩利之道也關外各城所駐大臣有辦事領隊幫辦之分所駐之兵有錫伯索倫達呼爾察哈爾蒙古厄魯特沙畢納爾及綠營攜眷兵換防番戍兵之分亂後舊制不可復按而辦事幫辦領隊大臣於本營存兵外兼帶馬步各營各請專餉所稱馬隊步隊旣罕能戰之兵而辦事幫辦領隊各員又非盡知兵之選徒糜餉糧無濟實用都統及各

大臣因慮產糧未極其豐增竈更形其絀力主畫地自封閉關謝
客之議以護官私屯糧不顧兵事利鈍金順進駐古城張曜進屯
哈密遲回不前而後隊尙迤邐原防者以此見在巴里坤古城已
辦採運哈密已開營屯金順張曜兩軍畱後之隊應卽陸續開拔
兵力旣增則屯丁可減竊維此時必分別兵農責兵以戰課農以
耕而後餉事可節兵事可精也哈密巴里坤古城所駐各大臣就
見在所存旂營核定糧餉如缺額過多准照舊額馬步就地挑募
丁壯補數但責其保守城隘不必責以戰事脫屯丁伍籍散之歸
農則盡力隴畝民樂耕其野而官屯私屯地畝收穫餘糧准照時
價發糶民益得其饒不但分駐各軍可資接濟卽調發續進馬步
沿途就地採購毋須裹糧以趨於兵事更覺順利較之見在辦法
兵農兩荒不猶愈乎如蒙

聖明鑒允應請

敕下金順文麟遵照辦理庶於時局有裨此籌整理哈密巴里坤
古城兵事實在情形也

諭旨關外兵事餉事并轉運事宜均責

臣

督辦而蘭州距前敵數

千里餉糧轉運雖可總其成至忝預戎機則調度指麾不能發當
其可自當簡率大軍親駐肅州相機辦理惟師行糧隨事豫則立
當此新穀未升駝隻歇廠轉運難期暢旺之時不先將前敵各軍
食糧灌運充裕催其畱後各營陸續開行而遽率大軍進發致佔

前敵軍食向後彼此兼顧更費周章督臣兼司關隴轄境遼闊移節肅州距關內腹地太遠又苦鞭長莫及調集各軍所遺營壘均是扼要地方非權其緩急移撥填紮於建威銷萌之計亦形疏略見在一面督飭西路各局於駝隻起廠之前趕催車馱層遞灌運一至八月卽調新駝分駐安西哈密各處分段層遞轉輸而調回車馱搬運新糧一灌運安西糧局一運供臣部軍食庶期會從容畜力舒展於事均便一面調集各路將領商議出關隨征留後防守各事宜及移營分紮一切務臻周妥臣之進駐肅州未能求速者此也至景廉所奏關內運糧至古城應以十萬石爲度以斤重計則三千餘萬斤非竭四五年之力不能辦到金順函開所有會

奏稿卷四十七

十

銜函牘全未與聞所需軍糧合畱後十餘營并計每年以市斗二萬石爲度尙只六百萬斤然此皆金順未調補烏魯木齊都統以前就彼時局勢言之也合併聲明所有籌辦糧運兵事謹據實陳奏伏乞

皇太后

皇上聖鑒訓示施行謹 奏

軍機大臣奉

旨另有旨欽此

俄國游歷官過境據實陳明摺

光緒元年六月二十八日

奏爲俄國游歷官過境察看情形無他據實陳明仰祈

聖鑒事竊臣於五月初五日欽奉

寄諭此次議奏有關繫西北事務業由總理各國事務衙門鈔寄左宗棠閱看卽著該大臣通盤籌畫以固塞防西北水利事宜并著該大臣會商譚鍾麟相機籌辦等因欽此維時承准總理衙門疊函見示知俄國游歷官索思諾福斯齊等有來蘭州出嘉峪關回國之事臣比函商陝撫臣札飭沿途地方官加意照護以示毋忘賓旅之義索思諾福斯齊旋於五月二十三日行抵蘭州臣引居署內接待如禮索思諾福斯齊等一行五人兵三通事一首謝

奏稿卷四十七

十一

沿途照料殷勤次言地方靜謐安撫回人之善察其情詞但有推挹而無矜夸臣頗疑其言不由衷然彼以敬愛之道來自宜推誠相與以導善機而徐覘所蓄酒席款待外間日一會食其同行有略解漢語漢字者爲之傳達一切較通事許槐尤爲妥協索思諾福斯齊言此來別無他意因大俄國皇上立意與中國永敦和好故令其前來并言回目馬海曾在俄國求和俄國皇上斥其爲賊不納伊犁暫駐俄兵原是防回侵害只俟中國打開烏魯木齊瑪納斯卽便交還并言中國如須幫助伊等願聽調度詢以新聞紙言英人因繙譯馬嘉禮被害欲藉此加兵緬甸窺我騰越併約貴國擾我西陲互相牽制有此說否索思諾福斯齊笑而不言但云

英長水戰亦長製造而陸戰不過爾爾其居心不良因引指作句
爲喻又言中國與本國素無交兵之事天下惟中國與俄爲大近
布洛斯亦稱大國故俄與布國君主得稱皇上他國不能因引指
作兩圍謂中國與俄和好卽各國不敢生心談次舉所用洋槍相
示內膛所句螺絲精緻特其後膛進子子發後轉出銅殼再裝再
發與所購福槍大致相同因取局製七響洋槍示之索大贊好引
觀仿造布洛斯新式大礮及改造小輪礮大洋槍均謂利器惟言
開花子未盡合法適六月初一日臣赴大教場閱操索等四人同
往閱視初擬照繪爲圖比見變陣迅速未及畫成其分合進止未
能詳也嘗出所畫輿圖見示於所經歷之處言之能詳而足迹未

奏稿卷四十七

三

經亦劃界開方布山列水備具大致詢其據何底本答云俄國從
前覓得康熙地圖故仿爲之比曉以康熙內府輿圖外尙有乾隆
輿圖因將刻本與看索等連聲稱是而已其同來四人一皮斜斯
齊一馬德度斯齊一安德列斯齊是俄國主所派又一名博晏爾
斯齊則索思諾福斯齊所帶以隨行者其才能口辯均出索下然
均無泰西各國驕佚矜夸之態詢其來意均稱俄國日用需茶向
由上海分銷水運天津出張家口至恰克圖分運其國各處程途
迂折若招湖商由楚達隴徑抵其國邊界可省程途五六千里俄
商運銷其國內各處又甚便捷中國與俄均收權稅充國用可爲
久遠相安之計此行之由楚蜀來甘蓋專爲探訪茶路也竊維俄

本名邦近關境日廣與中國緊鄰恰克圖立市通商由來已久聞西商在彼立業者頗不乏人索等此次請徑銷茶引以取捷便固有益於俄而中國藉此釐定行茶章程禁私販收利權以復馭邊懷遠之舊於我

國計亦大有益比以陝甘總督銜繫茶馬於茶務分應籌畫惟見方用兵未遑及此一俟邊境肅清當察酌情形咨商總理衙門詳議具奏索思諾福斯齊知口外採運極艱自請代爲採運由其國在山諾爾以達古城察其用意亦祇在速師期以通茶運由其議論諸事推其用心自無受威妥瑪暗中煽誘之理該俄使上年奉其國主之命而來其時何知有馬嘉禮被殺威妥瑪藉此肇衅之

奏稿卷四十七

三

事又何從受其指嗾其事易明見在俄使者等已於六月二十日起程歸國矣謹將接見索思諾福斯齊等察其用意無他情形據實陳奏伏乞

皇太后

皇上聖鑒訓示謹 奏

軍機大臣奉

旨另有旨欽此

請簡派大員幫辦陝甘軍務摺

光緒元年六月二十八日

奏為微臣督辦新疆軍務所有關內兵事餉事經理需才請

旨簡派大員幫辦陝甘軍務以期周妥仰祈

聖鑒事竊臣自蒙

恩調陝甘總督時已苦衰病侵尋於委頓之餘強自刻厲支持至

今又已入載當茲邊陲有事之秋非臣子言病之日茲復承

恩命督辦新疆軍務負荷更重彌切悚惶初擬本任事繁責重應

籲懇

天恩別簡實任人員以資填撫又慮嗣事之人或因未悉底蘊或

因意見參差致多牴牾臣茲出塞遠征兵事餉事必以關隴為根

奏稿卷四十七

南

本一有間隔則局勢立形滯礙貽誤戎機而所事未能預計歲月
師行未能預計遠近若非慎圖於始何能壹意馳驅無憂後顧此
私懷所不能釋然者也臣所部將士雖兼收并採不專一省一路
之人而自咸豐十年從戎以來久藉故鄉子弟之力至今檢閱伍
籍湖湘之產居多使嗣事之人非所素習則畱後各軍營未能適
然無疑指揮或難得力甘肅雖大局已定四境晏然回番善詐多
疑本其常態非善為撫馭亦恐措置失當事變旋生所以不敢遽
請

簡放實任者以此伏見前署陝西撫臣三品卿銜二品頂帶劉典
於臣在籍練軍時卽總理臣軍營務厥後轉戰江皖浙閩廣東幫

辦陝甘軍務獨當一面之日恆多其署陝西巡撫肅清全省功績昭彰所定陝西里差章程輿情翕然猶存遺愛嗣因母老多病告養乞歸蒙

恩開其署缺劉典感

矜全之恩山居五年晨夕侍養近聞其母蕭氏幸健如常尙有三子侍養在籍劉典暫離子舍似非不可伏懇

天恩敕令劉典速赴蘭州幫辦陝甘軍務本熟路而駕輕車外可孚民望內足協軍情於時局必有裨益而臣獲同心之助兵餉兩事無虞掣肘免致分心俾得畢其愚忱用之前敵則尤幸甚也劉典本係親老告養人員羈以職守非其心之所安惟該員前以三

奏稿卷四十七

五

品卿銜二品頂帶署陝西巡撫本無底缺可否仰懇

天恩以三品京卿候補幫辦陝甘軍務之處出自

聖裁此外尙有二品頂帶開復山西臬司陳湜一員本有用之才於甘肅地方軍務情形尤爲熟悉前以修墓告假回籍尙未來蘭臣已函催迅速前來謹一併聲明伏乞

皇太后

皇上聖鑒訓示施行謹 奏

軍機大臣奉

旨另有旨欽此

軍機大臣字寄光緒元年七月初九日奉

上諭左宗棠奏籌畫新疆軍務情形一摺新疆地方從前因兵力餉事未能兼顧以致久稽規復見在關內肅清正宜乘此事機力圖大舉綏靖邊疆左宗棠此次所陳籌辦糧運兵事有條不紊頗合機宜南北路分籌採運著該大臣督飭委員等妥爲經理俄官索思諾福斯齊到甘左宗棠與之商定由該國購糧運赴古城於軍食亦有裨益開屯爲邊防要務全在得人而理據奏張曜進屯哈密親率所部殫力經營已著成效該提督見未移軍務當實力興辦以規久遠巴里坤古城一帶開墾事宜左宗棠見派員前往察看并著該大臣悉心經畫次第舉行西路各營兵勇不宜耕戰

奏稿卷四十七

六

相兼該大臣所奏擇其精壯者束以營制如徐學功輩分別任用其不能戰者散之爲農卽著左宗棠金順會商妥辦以實營伍而增屯墾金順張曜兩軍雷後之隊卽當開拔前進兵力旣增則屯丁可減據稱哈密巴里坤古城所駐各大臣應就見在所增旂營覈定糧餉如缺額過多准照舊額馬步就地挑募丁壯補數但責其保守城池不必責以戰事脫屯丁伍籍散之歸農官屯私屯地畝收穫餘糧准照時價發糶各軍可資接濟於兵事更覺順利等語著金順文麟卽照該大臣所籌辦理左宗棠擬俟前敵軍糧灌運充裕甘省防守各事布置周妥卽簡率大軍進紮肅州該大臣當安速區畫俾出關各軍整旆西進迅奏膚公朝廷實有厚望焉

另摺奏俄官游歷過境察看情形等語俄官索思諾福斯齊請代
爲運糧意在速師期以通茶運其所請徑銷茶引以取捷便著俟
邊境肅清後由該大臣酌奪情形咨商總理各國事務衙門辦理
左宗棠所奏請派大員幫辦等語已明降諭旨將劉典以三品京
堂候補幫辦陝甘軍務并諭王文韶催令劉典陳湜迅赴該大臣
軍營矣將此由六百里諭知左宗棠金順文麟并傳諭張曜知之
欽此

奏稿卷四十七

甘捐各局暫行停辦片

光緒元年七月三十日

再臣前准總辦甘捐局務戶部左侍郎袁保恆咨開西征糧臺事務業經交代具奏其歷年經手甘捐總分各局捐項款目繁劇不能一時截止見派原管捐輸收支委員陝西候補直隸州知州庠文潢州判史悠順畱局勦辦俾資熟習再由接管糧臺陝西司道揀員經理等因臣比咨覆由袁保恆將歷年捐輸收支總數截齊自行奏報其已捐未繳銀米應開單交糧臺司道移咨催解所有各捐局暫行停辦以清起立統俟各省分局捐項埽數清釐再由臣督酌情形奏明辦理謹附片陳明伏乞

聖鑒謹 奏

奏稿卷四十七

六

軍機大臣奉

旨知道了欽此

甘肅鄉試通融辦理摺

光緒元年八月二十二日

奏爲監臨鄉試出闈謹將科場通融辦理事宜恭摺陳明仰祈

聖鑒事竊照本年甘肅與陝西分闈鄉試仿照四川以總督監臨

之例奏明入闈監臨并將入闈出闈日期恭疏

題報在案臣於八月初六日同正考官臣徐郟副考官臣劉瑞祺

入闈計應試者二千七百餘人場內外均恪遵規矩見在三場事
畢已將硃卷封送內簾十七日接試繙譯事竣照例將闈中事務
交提調監試道員督率辦理仍委臣標中軍副將駐宿貢院門外
巡邏稽查以昭嚴肅臣卽於二十日先行出闈惟查此次甘肅分
闈鄉試事屬草創關內地方多係新復之區士子流離遷徙之餘

奏稿卷四十七

九

資斧維艱未能剋期齊集又場前秋雨連綿積潦縱橫徒行艱阻
有不得不格外體恤者陝甘學臣吳大澂回陝錄遺所有甘肅應
錄遺才咨呈臣代辦臣雖限八月初二日截止其遲到諸生仍有
未及錄遺者亦准補試入場受卷之日臣督同提調監試各員查
閱應貼各卷照例議貼其添註塗改等項錯寫不合式及無礙文
理無關弊實者酌從寬免竊維甘肅從前因頻年賊氛肆擾赴陝
闈合試者人數無多西路北路士人尤以距陝太遠旅費維艱無
事之年卽多裹足竟有皓首窮經未能一赴鄉試者其年例合准
告給衣頂者卽紛紛具呈告給衣頂并歲試亦不赴矣邊方文教
未興士氣頹廢深堪憫惜此次幸蒙

天恩准其分闈鄉試又帶補壬戌

恩科鄉試遠近寒酸歌誦

皇仁羣知奮勵惟詩文經策雖勉事精研而條例法程尙難驟期
嫻熟竊體

朝廷敷教在寬之意飭受卷各員於議貼各卷稍與通融尤冀試
卷解部磨勘時得從寬議勿過拘成例相繩斯不獨隴士之幸也
除將原奉

欽命甘肅駐防繙譯題目另摺恭繳外所有甘肅科場鄉試通融
辦理事宜謹專摺具陳伏乞

皇太后

奏稿卷四十七

皇上聖鑒訓示施行謹 奏

軍機大臣奉

旨禮部知道片併發欽此

本年乙亥 恩科補行壬戌科請仍照舊編號取中片

光緒元年八月二十

日二

再甘省中額向有應編字號之丁字二名聿左一名本屆應歸入大號合試又聿右一名亦經臣奏請歸入大號合試惟同治八年補行壬戌等科鄉試時邊方尙稽克復應編字號士子道梗不前故是科并未編號本年乙亥

恩科闕內肅清關外安西鎮迪各士子于于而來若概歸大號合試慮不免向隅之感且既補行壬戌科鄉試則各屬之應由編號取中者自亦在應補之列未便令其缺望謹仰體

朝廷嘉惠邊陲寒峻至意此次仍飭編列字號惟咨明正主考臣

奏稿卷四十七

三

徐郁副主考臣劉瑞祺查照如編號佳卷果多即不拘定額憑文取中如僅能照額取中則仍舊編號亦無難按籍而知似見在辦法與科場條例定制兩不相妨謹附片陳明伏乞

聖鑒謹 奏

軍機大臣奉

旨覽欽此

軍餉支絀請速籌解濟摺

光緒元年八月二十五日

奏爲軍餉支絀伏懇

敕下部

臣疆臣

速籌解濟以顧全局而利軍行恭摺馳陳仰祈

聖鑒事竊維新疆糧運兵事一切情形

臣

已於六月二十八日據

實陳奏竊維

臣

軍餉項專恃各省協濟而協濟之款尤以添撥釐

金爲大宗查本年收款截至六月據西征糧臺月報各處文報約

收各關協餉一百四十餘萬兩內除袁保恆奏撥出關糧運的餉

暨抵解部撥款內劃收過銀五十四萬兩由袁保恆另案報銷外

臣軍實收協餉銀八十餘萬兩上年籌借洋款三百萬兩分四批

提解除陸續劃還上冬今春滬鄂陝省先後籌借商款本利銀一

奏稿卷四十七

三

百二十餘萬兩外實收銀一百七十餘萬兩又收袁保恆移交糧

臺見銀三十三萬數千兩收歸綏烏城贖存購駝銀十九萬餘兩

共收實銀三百餘萬兩此六月底以前餉項入款實數也至軍餉

出款以鹽菜乾銀爲大宗近因籌辦關外軍糧南北數路轉運騰

挪鉅款儘先兌撥半年以來通計出款已一百三十餘萬兩幾佔

入款之半此外遣撤裁併陝西固原提

臣

所部及

臣

軍宗岳營務

果字等營與零星裁併改兵約撤馬步勇丁長夫三千餘名共發

過實餉二十五萬餘兩哈密及肅鎮各營屬州縣屯墾水利經費

銀約十四萬餘兩墊發文麟明春軍餉糧價銀一萬四千六百餘

兩見因籌備出塞之師除畱防各營外又陸續增挑馬步十餘營

合共百三十餘營遣赴前敵者需酌給足餉分防各路者需照舊發給鹽菜糧價馬乾公費與夫軍裝軍火車駝什物採製之費關外臺站整頓修復之費及州縣津貼一切雜支由臣隨時核實通融酌濟共支發實銀一百三十餘萬兩臣前擬洋款借到後將東南各路防營再加裁併減汰軍裝軍火津貼轉運諸費可緩可減者均擬酌量核刪省內地經費勻濟關外乃粵海關票抵借之百萬兩前因部文有能否減借省息之商往返咨查羈延累月不獲大批徑解而奉

旨督辦新疆軍務所需軍裝軍火等項不但不能省節併須從新增廣製辦以故應需各款未能及時清理卽如穆圖善所部本擬

奏稿卷四十七

三

全撤而終以餉項無出僅擬先撤四營有零尙未定也臣遵

旨督辦新疆軍務自宜合關內外全局統籌就此情形而言微獨西路北路邊防及撫回各處防軍未可輕議裁減卽已經減撤者一經另有調派或地方緊要應酌量抽撥添募填紮或應撤勇添兵以期周妥內地存留各營既不能再擬裁減而檄調出塞馬步各營戴役遲速未可逆計應切實整理調集各隊勤加演習以期精而又精克收寡可敵眾實效各該營所需添買騾馬匹皮棉衣褲鑼鍋皮碗口袋等物應預備棚帳旂幟褂應更換軍械火器火藥應增籌軍行糧餉軍需各項轉運採製津貼各項均應寬爲籌備餉需較前有增無減者勢也軍行糧隨須趁新糧登場駝

隻起廠多撥經費分飭加緊籌採籌運方免臨事周章見除北路歸包總分各局撥款稍多可從緩撥解此外甯夏一路據該局員稟報由定遠營取道察罕廟經喀爾喀邊境之巴尚圖素廟與歸包糧駝會合徑趨巴里坤較歸化起運約近數站業於七月初一日試運頭批臣已飭儘多添雇趕運惟試運伊始大信未孚商情不無疑阻亟應加撥見銀俾應得腳價按批清給一面由臣頒發告示嚴禁巴里坤各軍拉差之弊庶可期其踴躍其北路之北古城巴里坤採運屯墾均應添解大批至南路關內採運除涼州勞費太重見擬停辦外其甘郡安肅各廳縣已據該管道員議詳共定採市斗夏秋糧十二萬二千石飭遵照上年舊章頒發期票銀

奏稿卷四十七

五

票搭發稍資騰挪而商民車駝腳價按斤按里計算運糧多則腳銀之多因之而增約略計算南路關內採運每月非得見銀二十萬兩不敷支發此見籌新疆南北各路糧運價腳應出之款也此外出款則仍以見存馬步各路土勇營兵正餉與夫軍需採製轉運腳費薪糧津貼各款爲大宗臣前於本年三月間據實陳奏每年共需實餉六百數十萬兩外增出關採運出款二百餘萬兩以每年實到協餉約五百萬兩劃抵出款八百餘萬兩已不敷實銀三百餘萬兩今則新疆兵餉糧運各事宜一切責臣督辦局勢更寬就見辦情形言之非獨糧運一事斷非上屆二百餘萬兩實銀所能敷衍卽見存馬步軍需正餉仍非六百數十萬兩不能支持

其裁併後積欠勇夫七百餘萬兩正餉之數又欠未發卹賞銀三十餘萬兩均須陸續發給實銀不能空言抵塞今年春夏協餉所入不及百萬兩所以能勉強勻劑者全賴奏借洋餉鉅款三四等月提銀以後所有蘇浙粵三省協餉每年連息共應劃解銀一百二十三萬餘兩清還借項是常年協餉入款近五百萬兩內又短去銀一百二十三萬餘兩矣出入兩抵前奏每年不敷銀三百餘萬兩者今實不敷銀四百數十萬兩此通籌餉項入出兩抵不敷之實在數目也奏借洋餉隨到隨罄應解協餉盼切成空部撥景廉庫款三十萬兩改解臣軍已咨照陝撫臣派員赴部請領而金順已函牘頻催并屬先行挪款墊解將來斷難藉此爲通融周轉

奏稿卷四十七

五

之資此外後路報解協餉僅只數十萬待撥之款陳欠相因源涸流窮時深廩廩如果各省關積欠甘餉能如上年臣議移臺經費奏案提解積欠之半應解協餉仍按月如數籌撥其部撥出關糧運的餉百二十萬兩又各省關抵解部庫銀八十萬兩除袁保恆經收銀五十四萬兩外短解銀一百四十六萬兩均能儘先籌解俾清界限而應急需庶各路開辦採運不致停運待銀調派出關諸軍不致停兵待餉乘見在南北各路開辦辦糧運漸有成效應調各軍檄令簡練整理漸有頭緒之時臣於協款解到時通融挹注尚可詳爲布置以赴戎機否則見辦諸事無項支銷待發諸軍無款散給而前進局勢難言矣鹽菜乾銀年終滿餉及准假勇夫不

能照舊發給而後路局勢難言矣迨事機已誤而後議補救之策所費益多求如目前局勢亦恐難得此尤微臣所日夜焦思而罔知攸措者合無仰懇

天恩俯念邊塞軍務緊要餉源枯竭待用方殷

敕下戶部各省疆臣速將部撥出關糧運專款內短解銀一百四十餘萬兩限期提解所有積欠甘餉二千六百一十餘萬兩分省分限指提若干應解協餉仍按月如數提解毋再延欠俾速戎機毋任惶悚待命之至伏乞

皇太后

皇上聖鑒訓示施行謹 奏

奏稿卷四十七

美

軍機大臣奉

旨戶部速議具奏欽此

光緒元年十月初四日准戶部咨開本部遵

旨速議陝甘總督左宗棠奏軍餉支絀請速籌解濟一摺應請

敕下各直隸省督撫將軍卽行查明上年由部提撥各款欠解若干勒限一箇月內埽數解清福建省欠解西征協餉三百餘萬兩應卽遵

旨趕緊如數籌解其餘各省欠解西征協餉統限於一年內先行各提解一半應用其餘一半欠解之餉仍隨每月應解協餉陸續分解至各省關按月應解協餉自本年爲始月清月款不准絲毫

再有蒂欠俾該督得以迅赴戎機免至貽誤等因具奏奉
旨依議欽此

奏稿卷四十七

三

關外新疆軍餉請仍歸戶部核撥摺

光緒元年八月二十五日

奏爲關外各軍及新疆各城軍餉擬請仍歸戶部核撥以歸畫一而專責成恭摺馳陳仰祈

聖鑒事同治十三年十一月初五日准軍機大臣字寄十月二十一日奉

上諭戶部奏出關各軍餉項暨新疆各城軍餉請統歸西征糧臺經理一摺見在大軍出關相機進取前降旨派左宗棠督辦糧餉轉運一切事宜并令袁保恆幫辦所有出關各軍應需糧餉運費等項自應統歸左宗棠袁保恆斟酌緩急奏請籌撥至新疆軍餉近年各城請撥頭緒紛繁殊不足以昭覈實亦應由左宗棠等一

奏稿卷四十七

五

併經理嗣後出關各軍暨新疆各城請撥餉需均由該統兵各員及各城大臣咨照左宗棠袁保恆覈明數目酌量奏撥不得紛紛自行奏請以歸畫一而專責成卽著左宗棠景廉金順袁保恆咨照該統兵各員及各大臣一體遵照辦理左宗棠袁保恆務當通盤規畫酌盈劑虛覈實籌撥毋任稍有匱乏原摺均著鈔給閱看欽此

臣

比恭錄咨照袁保恆由糧臺咨行遵辦嗣於本年二月准戶部咨送同治十一二三年奏撥新疆軍餉案由五六等月各城將軍都統大臣查開餉數源委先後咨報到

臣

比經逐股稽

覈誠如

諭旨頭緒紛繁殊不足以昭覈實

臣

忝督辦之任所有出關各軍

新疆各城餉需責臣一併經理藉非格於勢限於地曷敢稍惜心力不卽綜覈奏撥所以然者統兵出關大員如金順明春張曜暨景廉移文各軍各有專餉內除張曜嵩武一軍餉需向由河南撫臣解濟不歸西征糧臺經理外其餘金順等軍協餉自袁保恆交卸臺務當經臣筭飭接辦糧臺司道一遵向章按月將各該軍收解積欠銀數分晰開單呈報陝西撫臣核明奏報移催各該軍原撥專餉此後有無增減應俟金順接收景廉移交各軍核實汰遣添補足數按照實在馬步名額酌定歲需糧餉合明春所部名額餉需彙案咨報由臣另行核奏此時未能懸擬張曜全軍分駐哈密一帶除歷年挂支安肅哈密官局糧料由臣作正開銷外所有

奏稿卷四十七

五

開屯修渠應需氈條工具一切購製轉運腳價均由臣墊付俾得殫力經營惟東山熟地向係纏回自種該軍新墾荒瘠灌水又遲故今歲收成較薄見據張曜呈報估計夏秋屯種約得市斗毛糧四千數百石發硤收米約得淨糧八九十萬斤勉設該營兩箇月軍食臣前於四月間函致張曜請將屯糧開報歸公准照安西市價核銀散給兵勇俾償其勞見經咨照張曜一照原議開報領價一面趕趁秋間次第修濬放渠翻犁明年屯糧所入當可增多此外官私各屯尙可採買市斗三千石應照市價收買不准勒抑短價如與文麟明春軍食有礙卽作罷論已由臣分飭知照矣宋慶前遣總兵劉鳳清率步隊兩營分屯哈密原與張曜所部同屬豫

軍聲氣聯絡該軍調回潼關後與張曜彼此函商進止擬將劉鳳清兩營雷屯哈密改歸張曜節制調遣意見符合該兩營正餉已由宋慶裁發至本年底止嗣從十一月起由劉鳳清造齋花名餉冊歸臣軍照章支放屯墾經費屆時由臣核撥作正開銷業准宋慶來咨覆之并咨行張曜知照矣臣見調集各軍汰遣添募製造糧運諸款并由臣隨時酌量勻撥濟用將來彙案報銷此通籌出關各軍見在糧餉轉運兼顧哈密屯墾實在情形也至於新疆各城所駐大臣兵事餉事軍興以來舊制不可復按茲姑就近年部臣奏撥之款言之每月由直隸河南山東山西四省共撥銀七萬兩內除榮全奏准每月劃提銀二千五百兩以一半解榮全

奏稿卷四十七

三

勻撥伊犁塔爾巴哈臺以一半解烏城分撥烏魯木齊巴里坤哈密各城其分撥伊犁塔城一半餉內咨報臣軍有案者惟索倫官兵及額魯特察哈爾人眾丁口二千八百名俸餉糧價每月劃分銀二千八百兩又分撥烏城一半餉內每月應劃分哈密辦事大臣一萬四千兩其餘銀兩該各城如何勻攤每城經費撥支若干滿綠各營實存官兵馬匹若干鹽糧馬價各需若干均未報臣有案核撥無從著手此外又有榮全專餉原協添撥每月共銀五萬兩塔城額魯特官兵俸餉各臺駝價換防官兵鹽糧每月共銀一萬兩庫倫烏科各有專餉部臣指撥時有統解分撥之款有劃提撥抵之款有改撥墊撥指省解還之款有指提積欠坐扣之款各

城奏撥前後異情各省撥解積欠異數往復咨查動經歲月核覆
羈遲職是之故臣維綜覈名實慎重財賦通盤規畫總司出入者

部臣之職分也臣前奏設西征糧臺專司臣軍協餉入款按月開

單報部奏催咨提其於一切出款糧臺并不干預亦有不能兼顧

之勢也其各省關協濟景廉金順明春餉項則不盡由糧臺經收

山陝歸綏包頭等處各軍均設有轉運糧臺多寡贏絀均由各統

將自行核奏臣不得知豫師專餉祇由臺代催非如穆圖善雷正

綰所部甘軍均隸臣部裁併遣撤由臣會核辦理穆圖善所統步

營送有總數名單雷正綰造有花名故能由臣統收分撥情異事

殊未可同日語也近年新疆軍餉由各城大臣紛紛自行奏撥固

奏稿卷四十七

失畫一之規臣如查核未明冒昧具陳仍非覈實之道可否照部

臣劃解章程分段

敕下烏魯木齊都統伊犁將軍所屬各城歲需經費并見存滿綠

換防官員兵丁實在名額應支糧餉分款核實報部由部臣通盤

籌算仍就原協省分指撥有著之款定限撥解不准推諉從前積

欠新疆各城餉項分年埽數截清先行提解若干如何勻撥統由

部臣核定撥解俾歸畫一而專責成其東南及川陝各省應協出

關各軍新疆各城餉項凡移報西征糧臺有案者仍可由臺代催

所有遵

旨查核情形謹據實陳覆再文麟派員赴蘭請餉已由臣墊撥銀

一萬兩明春上年負欠玉門採買糧價銀四千六百餘兩已飭該
管局員照付清款其布倫托海臺站經費由臣另片附陳以清眉
目合併聲明伏乞

皇太后

皇上聖鑒訓示施行謹 奏

軍機大臣奉

旨戶部速議具奏欽此

奏稿卷四十七

三

請 敕各省勻濟餉需片

光緒元年八月二十五日

再見在時局洋防塞防并重人共知之而能言之而難易之分不能無辨洋防開辦一年經始之費可減塞上則正值用兵諸須從新籌措如軍火器械一切海疆隨時隨地可辦者塞上則須預爲籌計踰水陸萬里以達軍前始供取用一物之值購價加於運費已相倍蓰尚須先備採運實銀乃期應手其不同者一也海疆皆富饒之區各口通商又利源之所在以釐稅言除兩江歲入千萬緡曾見章奏外粵浙閩所收較丁糧奚翅一倍所需防費自己綽然甘肅則素稱荒瘠通省丁糧一歲僅二十餘萬兩亂後則併此亦難覆按農民喘息僅屬翻須由官多方勸相始免槁餓空山又

奏稿卷四十七

五

地氣高寒物產本絀土俗不解經商服賈出外求贏貧乏無聊坐以待困餅壘早罄挹注奚施其不同者二也東南澤國秔稻之鄉舟楫轉輸一帆千里商之謀生易裕官之籌措非艱甘肅則糧食升斗皆須負戴而行數十里之程非車駝莫致運腳之費每過糧價數倍且有多過十數倍者故東南各省糧與餉可合爲一西北則糧價腳價非由官另籌津貼不可其不同者三也用兵旣久官私耗竭有時需用孔亟儲積已空則於富室大商挪移借貸隨時歸款甘肅則本地無可籌商如協款不到惟有借用洋商鉅款及飭各臺局向附近殷實商人議息籌借然借洋款則必指省關還款以印票爲憑借華款則必飭臺局於附近商賈會萃之區籌

辦以信約爲憑近則陝鄂遠則上海相距遼闊不能剋期得銀而華款又多零星湊集爲數無多比借款解至則守候領取者環待已久一散卽盡旣非若海疆之就近取資可以省事又不能如洋商之易集鉅款可以久支如非計無復之未肯出此其不同者四也

臣自出師江皖轉戰浙閩所厯皆兵燹之餘就地籌維未嘗奏請部款就浙之餉需以討閩賊就閩浙之餉需以討粵賊迨事平調督陝甘而欠餉一律清還浙閩司庫亦漸有儲積益東南各省餉源可濬軍用易充轉運又便雖時艱孔急需浩繁但令經畫有方亦可勉資敷衍非若甘肅之無可取資仰給各省協款如嬰孩性命寄於乳媪乳之則生斷哺則絕也竊計沿海之防除從新

奏稿卷四十七

書

採購製造應用款項所有餉需一切未必多於前此用兵之時而南北兩洋又兼六省協款之入撙節支用防患未形綽有餘裕乃各省應協甘款旣不照常委解而各省之協濟洋防者又皆以洋防爲急塞防爲緩以致

臣

軍出款日增入款大減豈沿海防軍重於出塞征軍今日防海之事實急於出塞之事乎竊維餉源只有此數此壅彼缺勢所固然

臣

各轄一方畛域攸分恆情不免部

臣總司

國計因時制用乃其所宜無論防患未形較之整軍待發者事勢本自從容卽有時變故紛乘在腴疆就近籌維豈至遽形束手制用之道惟尙乎平均則無貧不易之理果能相其緩急爲之酌劑

則哀多益寡自可兩全卽以欠餉而言臣軍積至二千六百餘萬兩之多所部除火食馬乾寒衣單衣外每年僅發一月滿餉尙須多方設措似此窘蹙事何可長各省雖同值時艱但各就本省應發餉需節縮一兩月勻濟甘肅在各省所欠者不過一兩月之數在臣軍則可增數月之數是富者減一孟之食仍免號飢貧人利壺飧之加卽期宿飽不獨通融挹注大局藉可維持兼之樽節支銷積欠亦漸歸有著此則微臣區區愚悃不得不披瀝陳之者也見當整理軍事之時念及軍儲不供刻深悚惕謹據實附片具奏伏乞

聖鑒訓示施行謹 奏

奏稿卷四十七

七

軍機大臣奉

旨該衙門速議具奏欽此

光緒元年十月初六日准戶部咨開本部遵

旨速議陳明海防各餉係於各省應協西征軍餉之外添撥并非於各省應協西征軍餉之內勻撥各該省關自應各解各餉本毋庸作挪東補西之計以致有顧此失彼之虞應請

敕下各直省督撫將原協添協西征各餉及分解南北洋海防各款一體兼顧毋稍偏重卽飭各司道監督等務須各按各款照數清解不得因見有海防撥餉將西征各餉藉詞延欠等因具奏奉

旨依議欽此

請

敕山西劃撥科城臺費片

光緒元年八月二十五日

再臣前准科布多參贊大臣托倫布幫辦大臣保英會銜咨稱接管布倫托海臺站及科屬東西北三路新舊二十七臺差徭煩重倍甚曩昔上年奏請幫貼臺費專款三萬兩部臣因科城臺費向由山西按年協解烏里雅蘇臺分撥縱因添臺增費亦應遵照前奉

諭旨自行知照左宗棠斟酌緩急奏明辦理奉

旨依議欽此等因恭錄咨行到臣竊維科境各臺尋常文報之外尙有新疆各軍軍火餉鞘由綏遠城張家口出邊取道科城時需駝馬轉輸臺兵護送歲請幫貼銀三萬兩似尙無多應否

奏稿卷四十七

美

敕下部臣仍就山西例撥烏城臺費款內劃撥的餉分批解濟之處出自

天恩理合據實附陳伏乞

聖鑒訓示施行謹 奏

軍機大臣奉

旨戶部速議具奏欽此

請

救兩江迅解老湘全軍月餉片

光緒元年八月二十五日

再臣此次成師以出志在勦賊綏邊并爲建成威銷萌之計惟自忖年衰病久深虞精力未足副其志致貽

宵旰之憂亟圖倚任良才匡其不逮三品卿銜見署西甯道劉錦棠英銳果敏才氣無雙近察其志慮忠純尤堪重任見令率所部老湘全軍從征并委總理行營事務俾隨征各營得有稟承庶資展布此外統領營哨各員均酌簡相信員弁樂事赴功者用之竊維西事之葺未卜何時專就劉錦棠一軍而言按月由金陵撥給餉銀四萬五千兩上年洋防議起兩江延未撥解見署督臣劉坤一雖知其艱疊飭委解然僅解至上年十二月止自今正以後入

奏稿卷四十七

三

箇月共計欠解之餉三十六萬兩見正料理行裝無可籌墊伏懇天恩敕下兩江督臣迅將老湘全軍月餉如數委解前來俾得迅赴戎機此後該軍月餉仍請

救兩江照舊按月委解毋再羈延庶足保茲勁旅謹附片陳明伏乞

聖鑒施行謹 奏

軍機大臣奉

旨另有旨欽此

請 敕福建迅解協甘欠餉片

光緒元年八月二十五日

再閩省協餉經臣奏准原協銀四萬兩添協銀四萬兩西征以來每月僅解銀五萬兩同治十一年十月福建輪船局經費告匱臣以西事安危不過一時之計輪船控馭沿海實

國家久遠之規深慮功敗垂成奏請於臣軍餉項五萬兩內劃撥

銀二萬兩交輪船局收支以免廢輟計自同治十二年正月共

撥過船局銀二十六萬兩臣軍每月僅收閩省協甘餉銀三萬兩

是年十月總理船政臣沈葆楨以船工將竣所加月款二萬兩可

以節省具奏鈔咨到臣當經咨明福建督撫臣以船局經費既無

需劃撥自應仍解甘省以濟軍需而該省於同治十三年三次解

奏稿卷四十七

美

到銀九萬兩又本年五月撥解出關經費銀二萬兩統截至光緒元年六月止共欠解銀三百一十二萬兩新疆軍務方殷若如福建一省先後兩年僅解銀十一萬兩懸欠過多實非意料所及合無仰懇

天恩敕下福建督撫臣迅速飭司趕緊設法籌解以符原案而速

師期謹附片具陳伏乞

聖鑒施行謹 奏

軍機大臣奉

旨另有旨欽此

軍機大臣字寄光緒元年九月初七日奉

上諭左宗棠奏軍餉支絀請敕速籌解濟并關外各軍及新疆軍餉請仍歸戶部覈撥暨請各省勻濟餉需請敕戶部劃撥科城的餉各摺片本日已諭令戶部速議具奏另片奏請敕兩江迅解老湘軍月餉及請敕福建迅解欠餉各等語已寄諭劉坤一等卽速籌解矣關外事機甚急餉需支絀自不得不竭力圖維先其所急見在金順已抵古城各路官軍皆可陸續前進亟當乘此機勢趕緊設法進兵迅圖剿辦軍事餉事左宗棠仍當妥速區畫俾出關各軍整旆西進迅赴戎機一切情形并著隨時詳悉奏聞以慰塵系將此由五百里各諭令知之欽此

請 敕劉典迅速赴甘摺

光緒元年九月二十八日

奏爲軍務需人仍請

諭令候補三品京卿劉典迅速赴甘幫辦軍務恭摺馳陳仰祈

聖鑒事竊臣前於六月二十八日拜摺懇

恩敕令劉典速赴蘭州幫辦軍務荷蒙

聖慈俞允嗣准湖南撫臣王文韶鈔送八月初三日代奏摺稿知

劉典以母年衰邁身病未愈籲懇

天恩養親治病以終餘年其時劉典尙未接到臣鈔摺咨會并函

告一切也旋接得臣函牘知已敍及親老告養人員羈以職守非

其心之所安已仰蒙

奏稿卷四十七

早

聖慈曲諒泣告其母謂既無職守進退似尙綽然如親體不適已
病有加屆時據實陳情或可仰邀

聖明鑒察諸子及其親屬又以

高厚之施

矜恤之德宜不敢負劉典之母感激涕零疑懼頓釋頃又接劉典
手函謂母已轉念并飭其促裝惟母壽在十月初旬擬叩祝後乃
可就道計其發函之時尙未欽奉

諭旨也如蒙

天恩仍令劉典幫辦陝甘軍務仰懇

速敕王文韶轉飭劉典迅卽啟行幫辦陝甘軍務計

諭旨到湘不過旬餘較由臣欽奉鈔咨轉寄湖南可早二十餘日
俟劉典到甘將軍務逐一交代啟程西征不至稽延過久區區
愚忱伏乞

皇太后

皇上聖鑒訓示施行謹 奏

軍機大臣奉

旨昨據譚鍾麟奏請敕劉典迅赴蘭州已諭令王文韶傳知該員
欽遵前奉諭旨迅速起程矣欽此

奏稿卷四十七

望

楊昌濬如能去浙度隴可資臂助片

光緒元年九月二十八日

再陝甘軍務近雖幸承

福芘一律肅清惟轄境兼蒙古回番之地因習俗而施政教隨時隨地剛柔異宜見雖安謐然建威銷萌規畫久遠者實難悉舉入告又臣所部各軍雖不僅一省一路之人究竟楚產爲多各將領皆由十餘年前舊部未弁勇丁積功拔擢所致臣之馭軍別無才能權智所恃者誠信不欺絲毫不苟不敢以一時愛憎稍作威福致失人心行之既久湖湘子弟習而安之雖欠餉積多尙無異說回思咸豐十一年成軍以出口在憂危惕厲之中至今猶惴惴焉

臣茲奉

奏稿卷四十七

聖

命督辦新疆軍務雖自慙非分然誼不得辭而內顧茫然時形憂懼將士聞臣荷

新命多赴蘭州自請隨征出塞者默察隱情蓋均慮及餉項積欠爲數太鉅臣出塞遠離恐軍情未能帖然也竊維咸豐十年臣奉

命襄辦江南軍務其時辦理臣軍營務者三人一道員王開化不

幸積勞早逝蒙

恩予諡貞介一劉典一浙江撫臣楊昌濬皆平時道義切劘潔清

自矢堪共患難之人時論或有不同而信行相符至今實堪覆按臣茲遠出兵事餉事不能不以陝甘爲根本若後顧不免他虞大

局何堪設想臣之所以籲懇

聖恩簡劉典幫辦陝甘軍務者以此邱鈔楊昌濬因病請假已蒙
天恩給假一月如楊昌濬能去浙度隴則臣更可資其臂助微臣
之幸亦西事之幸也謹披瀝附片陳明伏乞

聖鑒訓示施行謹 奏

軍機大臣字寄光緒元年十月初九日奉

上諭另片奏浙江巡撫楊昌濬如能去浙度隴可資臂助等語西
陲軍事緊要勦辦需人惟楊昌濬係封疆大吏如令前赴軍營應
如何位置之處著該大臣先行奏明請旨辦理欽此

河州鎮沈玉遂辦理番案妥洽懇

恩交部議敘摺

光緒元年九月二十八日

奏爲河州鎮官軍查辦隆哇番匪事竣地方安謐情形恭摺仰祈
聖鑒事竊查甘肅循化廳所轄各番惟隆哇番族素稱兇悍屢與
卡家番族尋仇鬪殺焚燬房屋搶奪財物屢經查辦隆哇恃其族
眾地險陽奉陰違臣因卡家番族赴愬情詞懇切飭河州鎮總兵
沈玉遂親赴循化察酌辦理沈玉遂酌帶馬步隊於八月二十二
日由河州啟行二十三日抵土門關先派妥弁率馬步勇丁持諭
赴隆哇勒令交犯繳械番眾竟暗施槍礮轟傷騎兵數名繼派馬
步大隊進剿猶敢拌死抗拒沈玉遂督官軍前後夾擊番眾始敗
追斬二十餘名獲馬二十餘匹又槍二十餘杆收隊駐紮麻隴二

奏稿卷四十七

四

十六日沈玉遂飭循化廳安福仍派各番頭目前往宣諭勒限縛
獻首要各犯免其進剿各番目回報隆哇番族仍抗不遵依沈玉
遂復督馬步大隊由麻隴開抵番卡分三路進剿番眾憑險施槍
中傷勇丁數名沈玉遂憤甚帶隊向前奮擊番匪敗潰擒斬隆哇
賊目紅布等并悍番四十餘名獲馬甚多番眾駭懼紛跪軍前乞
恩遂勒限交犯繳械九月初二日沈玉遂進駐隆哇各番攜斗酒
隻羊詣營求見并據先後縛獻首犯且格楞加等五名訊明正法
繳又槍矛杆多件其從前械鬪劫搶各案均由沈玉遂督飭循化
廳安福調集各番審訊明確持平斷結沈玉遂以番性崇信佛教
選擇素爲番眾敬服之寺僧歲蒼令其總管番族取具番眾遵依

切結稟臣頌給執照旋於九月初八日率隊回防隆哇以平臣維
隆哇番族玩法抗官野性難馴已成痼習此次經官軍聲罪致討
分別懲辦該番族自將首要各犯縛獻軍前訊明正法并收繳槍
械實足戢兇俗而遏亂萌所有河州鎮總兵沈玉遂辦理番案諸
臻妥洽應懇

天恩交部議敘以示激勵謹專摺具陳伏乞

皇太后

皇上聖鑒訓示謹 奏

軍機大臣奉

旨另有旨欽此

奏稿卷四十七

聖

軍機大臣字寄光緒元年十月十一日奉

上諭前據譚鍾麟奏請指提西征年終一月滿餉并催各省奉撥出關糧運的餉暨催提金順等軍糧餉當令戶部速議具奏茲據該部奏稱本年九月間左宗棠奏請將部撥出關糧運專款內短解銀一百四十餘萬兩限期提解經該部奏准令各省查明欠解上年部撥各款勒限一箇月解清卽著該將軍督撫等查照戶部奏案辦理至譚鍾麟請提西征各軍年終一月滿餉六十萬兩據戶部奏稱擬於浙江四川湖北山西各提銀七萬兩福建廣東河南各提銀六萬兩江蘇提銀五萬兩安徽提銀四萬兩湖南提銀三萬兩山東提銀二萬兩共銀六十萬兩均在各省積欠西征協餉內提解等語卽著各該省督撫如數籌撥限本年十一月內解清毋得稍有短欠至金順軍山西月協銀二萬兩河東道月協銀一萬五千兩四川月協銀三萬兩湖北月協銀二萬兩陝西月協銀一萬五千兩江海粵海江漢三關月各協銀二萬兩共銀十六萬兩嗣將湖北四川兩省協餉內按月劃分明春銀三萬兩見在金順每月協餉銀十三萬兩明春每月協餉銀三萬兩金順接統景廉一軍月餉山東月撥銀二萬兩河南月撥銀二萬兩山西月撥銀一萬兩四川月撥銀二萬兩湖北月撥銀五千兩共銀七萬五千兩經戶部奏明各省欠解新疆軍餉內按月撥解豫師月餉山東月協銀一萬兩河南月協銀一萬兩兩淮月協銀五千兩共

銀二萬五千兩張曜月需駝乾銀五千兩亦經奏准在山西藩庫按月撥解自本年五月以來除陝西月協金順餉銀業經籌解外其餘各省關應解各軍月需餉乾或全未報解或欠解甚多著各該督撫等將每月應撥金順等軍餉乾飭令各監督司道等按照協撥數目報解月清月款如再遲延短解卽由左宗棠譚鍾麟分別指名奏參其以前欠解月餉并著先解一半限一年內分解各軍應用其餘一半仍隨同見解餉銀按月設法措解俾資接濟譚鍾麟於前項各餉解到時卽迅速撥解各營以應急需將此由五百里諭知左宗棠福州將軍兩江湖廣閩浙四川兩廣江蘇安徽江西浙江福建山東山西河南湖北湖南廣東陝西各督撫并傳

奏稿卷四十七

畢

諭粵海關監督知之欽此

軍機大臣字寄光緒元年十一月十五日奉

上諭金順奏歸併隊伍并擊敗撲屯賊匪一摺賊匪撲犯水泉地方圍攻屯莊肆行劫掠經金順飭令總兵孔才派隊擊退仍著督飭防兵隨時探擊以杜紛竄金順軍營見將景廉移交馬步各隊汰弱留強併爲馬勇十營步隊九營卽著嚴飭統領各員隨時認真訓練俾成勁旅其畱紮安肅各隊見因駝運不繼致稽前進著左宗棠妥籌接濟以期迅速成行金順仍當設法接運催趲西進并與左宗棠隨時會商迅圖進剿毋得藉詞延宕致誤戎機江蘇奉撥金順軍營駝價銀五萬兩久未報解見在該營採辦駝隻需用孔亟著沈葆楨吳元炳督飭藩司限年內如數籌撥卽交金順

奏稿卷四十七

吳

委員領解回營以濟要需將此由五百里各諭令知之欽此

餉源涸竭擬續借大批洋款權濟急需摺光緒元年十月十四日

奏為遵

旨整軍出關餉源涸竭擬續籌鉅款權濟急需恭摺馳陳仰祈

聖鑒事竊臣上年遵

旨裁併留馬步一百四十一營嗣撤穆圖善所部步隊四營半零星資遣仍存馬步一百三十餘營每歲需實餉六百餘萬兩加出關糧運經費每年需銀二百數十萬兩通計一年出款共需實銀八百數十萬兩臣據實陳奏在案各省關原撥添撥協甘餉數原共八百二十餘萬兩臣統收分撥實則每年陝西撫臣劃收六十萬兩涼莊營每月額餉五千兩毅軍運費每月萬五千兩穆

奏稿卷四十七

覽

圖善馬隊每月劃收江南一萬兩通計一年撥去協餉銀九十六萬兩是協甘餉數入款歸臣經收者實祇七百餘萬兩也臣二次督師入關度隴各省關每年解到協餉約五百萬兩合指輸入款極力撙節支銷截長補短挪東掩西每年虧挪勇餉百數十萬兩新陳遞欠無可彌補近自籌辦海防東南沿海諸省協解甘餉日漸減少除江西浙江兩省尙肯力顧大局仍舊報解外福建河南兩省協餉全停不解見據西征糧臺呈報截至本年十月合蘇浙粵三省劃還洋款借項共祇收過各省關協餉實銀二百六十餘萬兩僅逮常年解款之半其奏提本年年關滿餉六十萬兩僅浙江七萬兩已准照解四川報解五萬兩山西報解三萬兩此外尙

無起解消息入款之減如此臣見遵

旨整軍出關軍需應用火器子藥皮棉衣褲氈包棚帳駝騾馬匹採買製造轉運諸費一款動需數萬十數萬不等出款之增一也汰遣弁丁應清欠餉添募精壯應增正餉出塞征夫除食糧應照章核扣正餉外餘餉均需見銀實發出款之增二也哈密巴里坤諸處餉項部臣責其核奏漸且改爲挪墊出款之增三也南北各路糧運九月以後愈加暢旺用車駝騾馬人夫畜牲各數萬計腳費薪糧概須見發口袋氈條車馱配帶什物需隨時添置預備所費倍加於前出款之增四也師出南路安西西迄古城屬之三箇泉子沿途戈壁相間人煙斷絕薪桂米珠軍糧須數百里轉饋柴

奏稿卷四十七

辛

草須數百里割刈非預先發價飭各該印官局員設法購備不能過師巴古兵民屯墾之委員設局者耕牛籽種農具採購製造動需鉅費出款之增五也俄人允爲承辦軍糧勞費雖省而腳價均須見銀發給至遲不能逾三箇月之限道遠運艱宜預爲籌解出款之增六也關以內馬步百餘營鹽糧餉乾薪炭公費地方津貼諸款每月仍非數十萬兩不能點綴出款如此上年奏借洋款原擬湊集見餉遵

旨大加裁撤減一分積欠卽省一分出款乃洋款到甘遲緩除扣還前借商款外餘銀一百七十餘萬兩先後到甘祇敷支發隨到隨罄欠發勇夫正餉八百餘萬兩上年已清釐二百餘萬者今又

漸增新欠陳陳相因莫知所底見因年節屆時應發滿餉一月各營將弁兵勇盼望甚殷出關馬步各營已調赴涼州合隊待餉進發各路糧運腳價待銀應付稟牘紛來急如星火臣無以應也不得已飭辦理臣軍駐鄂後路糧臺道員王加敏駐陝軍需局道員沈應奎籌借商款六十萬兩提前解甘由臣分別點綴權濟目前欠餉之日益加增又如此臣前奏軍需支絀請速籌解濟嗣接准部覆請

旨敕下各直省督撫將軍卽行查明上年由部提撥各款欠解若干勒限一箇月解清福建欠解銀三百餘萬兩應飭遵

旨趕緊如數籌解其餘各省欠解西征月餉統限一年內先行提解一半其餘一半欠餉仍隨每月應解協餉陸續分解從本年爲始各省關應解協餉月清月款不准絲毫帶欠俾該督得以迅赴戎機免致貽誤奉

奏稿卷四十七

五

旨依議欽此嗣經陝西撫臣譚鍾麟奏提元年年關滿餉部臣援照成案請由浙江等十一省共提銀六十萬兩奉

旨統限十一月解清各等因欽遵咨行并飭糧臺分別委員遵限守催車馬舟船相望於道舌敝脣焦迄少應者

朝廷軫念出塞征軍所有應解西征協餉嚴切限催

廷旨煌煌各省疆臣非敢視爲具文也隴餉奇絀停兵待發共見共聞婉懇諄催而延緩如故者非必悉存膜視也餉源祗有此數

此盈則彼絀顧此則遺彼理所必至勢有固然查部撥西征軍餉一歲應解之數雖有七百餘萬兩其實在可靠專款向以東南七省釐金爲大宗上年部臣籌撥海防各餉內由蘇浙等六省每年劃分釐金二百萬兩雖曾聲明在於應協西征軍餉之外添撥各省關自應各解各餉一體兼顧毋稍偏重固已預慮各省關之先洋防而後塞防然究之沿海腴區與隴中荒瘠既非可相提并論整軍待發之餉與先事預防之餉亦非可併責之一時者疆臣眡域之見難忘望其捐已急公固無其事卽責其先人後已亦勢有難能就目前實解協甘之餉計之幾比常年短至一半積欠協餉非獨未能遵

奏稿卷四十七

五

旨先提一半依限照解見截至十月且增欠至二千七百四十餘萬兩是東南釐金大宗旣被洋防佔去其波及塞防者固不能多也

諭旨敕令先其所急原統洋防塞防言之令疆臣權其緩急以爲先後也部臣劃洋防塞防爲兩款疆臣之專協洋防勢難兼顧塞防亦必至之勢前此李鴻章議停撤西師減塞防之餉以裕洋防意本如此特無如事有所不可耳見在西師旣不可撤且須增出塞之師籌塞外之糧運屯墾經費日增於前而各省關應協西餉且愈減於前全隴瘠苦情形甲於天下就地旣無可籌專盼各省釐金協濟而各省釐金大宗又均爲洋防佔盡部限雖嚴轉瞬卽

屆年關各省應解各款迄未報解臣萬不獲已飭臺局籌借六十萬兩暫顧目前原約明年二三月歸款屆期各省協款卽令旺解必陸續清還借款而臣軍已寅支卯糧協款一到卽盡仍屬無濟若不提還借款則失信商人此後并籌借之一綫生機而亦塞矣晝夜圖維罔知攸措竊維上年籌辦臺防經今兩江督臣沈葆楨議借洋款一千萬兩按每年八釐行息分作十年籌還業與洋商定約具有成議嗣臺防事定減借二百萬兩仍分十年撥還在案應懇

天恩俯念隴餉涸竭事機急迫俯准援照臺防成案

允借洋款一千萬兩仍歸各省關應協西征軍餉分十年劃扣撥還於

奏稿卷四十七

壹

國計絲毫無損於各省應解協餉藉資騰挪微臣得所藉手迅赴戎機於目前局勢實有裨益如蒙

允准仰懇

敕下兩江督臣查照上年成議迅速妥籌具奏辦理大局幸甚所有出關餉源涸竭局勢難支擬續借大批洋款權濟急需各情謹據實陳奏伏乞

皇太后

皇上聖鑒訓示施行謹 奏

軍機大臣奉

旨該衙門速議具奏欽此

奏稿卷四十七

善

籌借洋款懇照臺防辦法片

光緒元年十一月十四日

再泰西各國遇有兵事向商人借用鉅款相習爲常洋商之來華貿易者每以此爲利從前尚有以應需借用洋款與否向問者可知用兵借銀本各國常例商情稱便無華商居奇之心且借數愈多則息銀愈減亦與華商計畫迥異沈葆楨籌辦臺防時聞初議借用洋款一千萬兩每歲給息銀八釐洋商樂從并無推諉其時卽有爲臣籌策者謂隴餉艱難至此盍亦仿照辦理免至坐失事機臣以關內業已肅清宜力圖撙節故只擬商借三百萬兩嗣奉命督辦新疆軍務籌辦關外採運出款日增而擬借洋款又因部議游移洋商見胡光墉取銀遲緩懷疑未釋前又因粵東故生枝

奏稿卷四十七

壹

節畫押蓋印均多推諉商情不能釋然雖勉踐前言而發銀遲緩致臣處遣撤諸事未能應手徒耗月息而應協各省見已借洋款三百萬兩遂謂隴餉或可稍資周轉漠不關懷不知臣因洋款遲到先飭各臺局息借華商各款外只一百七十餘萬兩到營耳頻年艱苦竭蹶之狀莫此爲甚臣不善經理人乎何尤見在出關各營均已齊集涼州日加訓練擬於明正拔隊先行臣之親軍亦已整理完繕俟幫辦軍務臣劉典到蘭將畱防善後諸務面商一切不過旬日亦卽啟行惟默計前途軍火子藥糧食柴草雖略有儲時而行餉不能攜帶一月倘後路無餉接濟不堪設想又出塞之行成敗利鈍非能逆覩縱令事機順利而合新疆周二萬里地方

規畫久遠較之洋防七千餘里局勢尤寬歲月久暫遲速非可逆計徒擊空拳以談遠略非特無其理亦無其事暫擬籌借洋商鉅款實迫於萬不得已之苦衷伏懇

聖慈特敕沈葆楨仿照臺防辦法代臣籌借俾臣得所藉手稍圖尺寸之效西事之幸亦臣之幸也至其息銀多寡及一切辦法請由沈葆楨酌定臣不與聞緣沈葆楨素爲各國所信服商借洋款曾有成議此時重尋舊說可免洋商疑慮又辦理南洋事務就近與各省關商議可無窒礙較臣所處尙易爲功區區愚誠非敢有他謹并以附陳伏乞

聖鑒訓示施行謹 奏

奏稿卷四十七

美

軍機大臣奉

旨該衙門速議具奏片併發欽此

